

Ikuallannaveersaartitsineq qatserinerlu pillugit Inatsisartut peqqussutaat

Kallerup innera, imeqarneq kiassaateqarnerlu, qatserisartoqarneq, umiarsualiviit, aqqusernit, nalunaarasuartaateqarneq il.il. pillugit Kalaallit Nunaannut inatsit nr. 943, 23. december 1986-imeersoq naapertorlugu matumuuna makku aalajangersarneqarput:

Kapitali 1.

Qatserisartoqarnerup aaqjissuussaanera pillugu.

§ 1. Inatsisartut peqqussutaanni uani malittarisassat naapertorlugit kommuni suugaluartorluunniit qatserisartoqatigiinnik pilersitsisussaavoq, kommunimi illuliortiternerit siaruarsimani suussusiilu tunngavigalugit, sulliviit kommunimiittut pissusii, inuit eqimassusiat, imeqarneq il.il. tunngavigalugit ikuallattoqartillugu ajunngitsumik annaassiniarlutillu qamitsiniarsinnaasussanik.

Imm. 2. Kommunip qatserisartoqarnerani qatserisartut immikkoortortaarfii ataasiusinnaallutillu arlaliusinnaapput. Qatserisartut immikkoortortaarfia, kommunimi illoqarfiit pingaarnersaata inissisimaffigisaaniittoq, nalinginnaasumik ikiuukkiartorasuartartuussapput biilini angallasersukkat, kommunilli qatserisartoqarnermut immikkoortortaarfini allani nalinginnaasumik upalungaarsimasussaataassapput oqinnerusunik atortulersukkat.

Imm. 3. Naalackersuisut kommuni ikiuukkiartorasuartartussanik imaluunniit upalungaarsimasussaataasunik pilersitsinissamut tamarmiusumik imaluunniit ilaannakuusumik pinngitsoortissinnaavaa, qatserisartut immikkoortoqarfianni pineqartumi annaassiniartarnissamik qamitsiniartarnissamillu iluarsartuussineq illersorneqarsinnaasoq allatut iliorluni pilersinneqarsimappat.

§ 2. Kommunip qatserisartoqarnerani kominunalbestyrelsi qullersaasumik siulersuisuussaaq. Nalinginnaasumik siulersuineq ingerlanneqassaaq kommunip qatserisartoqarnermut ataatsimiititaliaanit, taamaattorli takuuk imm. 4.

Imm. 2. Qatserisartoqarnermut ataatsimiititaliaq arfinilinnik ilaasorta qarpoq, taakkunannga sisamat kommunalbestyrelsimit toqqakkat. Taakkunannga pingasut kommunalbestyrelsimut ilaasortaassapput, ataaserlu kommunimi teknikkikkut ingerlatsivimmi atorfiliussalluni. Qatserisartoqarnermut ataatsimiititaliamut ilaasortaapputtaaq qatserisartoqarnermik nakkutilliisoq, brandinspektøri, ilaasortarlu ataaseq Kalaallit Nunaanni Politimesterimit toqqagaq.

Imm. 3. Qatserisartoqarnermut ataatsimiititaliap siulittaasussaa kommunalbestyrelsip toqqassavaa kommunalbestyrelsimut ilaasortat kommunalbestyrelsip toqqagaasa akornannit.

Imm. 4. Qinnuteqartoqarnerata kingorna naalackersuisut akuersaarsinnaavaat siulersuineq kommunimi ataatsimiititaliamit allamit isumagineqassasoq.

§ 3. Kommunini tamani qatserisartoqarnermut ileqqoreqqusaq suliarineqassaaq makkununga maleruagassianik erseqqinnerusunik imalik:

- a) qatserisartut aaqqissuunneqarnerat sulinerminnilu atugarisassaat,
- b) kommunimi imaluunniit kommunip ilaani qatserisartut immikkoortortaqarfiinik pilersitsinissaq,
- c) qatserisarnermi atortut pisatsersuutillu nassaassaasussat aammalu aserfallatsaalisassat kommunip akiligassaanik,
- d) qatserinermut atortut, pigisanik aalaakkaasunik piginnittut pissarsiarisassaat aserfallatsaalisassaallu,
- e) imermik pilersuineq qatserinissamut pisariaqartoq,
- f) ikuallattoqartillugu kalerrisaarinissaq.

Imm. 2. Qatserisartoqarnermut ileqqoreqqusaq kommunalbestyrelsimit suliarineqassaaq naalakkersuisunillu akuersissutigineqarluni.

Imm. 3. Kommunilbestyrelsip isumaanut akerliusumik ileqqoreqqusami aalajangersakkamik ilanngussisoqarsinnaangilaq qatserisartoqarnermut tunngasut nutarterneqarnissaat pillugu imaluunniit qatserisarnermi atortut amerlineqarnissaat pillugu imaluunniit atortussat allat nutaat atulernissaat pillugu, tamakkunuuna kommuni annertuumik aningaasartuuteqarnerulersinneqassappat, tunngavissat pisariaqarluinnartut taamaasiornissaq pisariaqartilersimangippassuk.

Imm. 4. Qatserisartoqarnermut ileqqoreqqusaq kommunalbestyrelsimit tamanut saqqummiunneqassaaq.

Imm. 5. Ikinerpaamik ukiut tallimangorneri tamaasa qatserisartoqarnermut ileqqoreqqusaq nutarterneqarsinnaasutut oqaluuserineqartassaaq.

§ 4. Kommunini tamani qatserisartoqarnermik nakkutilliisussaq kommunalbestyrelsip toqqassavaa.

Imm. 2. Qatserisartoqarnermik nakkutilliisoq pisussaavoq atorfimminiissalluni sivikinnerpaamik ukiuni arfinilinni, taamatut atorfeqanngitsoorumanissamut pissutissaqavinngikkuni. Qatserisartoqarnermik nakkutilliisutut sulisimasoq nutaamik toqqarneqarnissaminut akuersinissamut pisussaataangilaq, piffissaq suliffigisamisut sivistutisigoq qaangiutereersimatinnagu.

Imm. 3. Qatserisartoqarnermik nakkutilliisoq malittarisassat atuuttut naapertorlugit akissarsiaqassaaq.

Imm. 4. Qatserisartoqarnermik nakkutilliisoq piffissami taamatut atuuffigisamini kommunimi suliasanik allanik suliaqarumanani kissaateqarsinnaavoq.

Imm. 5. Imm. 1-imit 4-mut maleruagassiat assingi naapertorlugit qatserisartoqarnermik nakkutilliisup ikiortissaatut qatserisarnermi assistentit marluk amerlanerilluunniit toqqarneqarsinnaapput.

Imm. 6. Qatserisartoqarnermik nakkutilliisoq kommunimi qatserisarnermut tunngasut ulluinnarni siulersorneqarnerat isumagissavaa aammalu qatserinermut atortunik nakkutilliissalluni.

Imm. 7. Qatserisartoqarnermik nakkutilliisoq nammineerluni imaluunniit taartigisani piginnaatitaasoq aqqutigalugu misissuisassaaq illorsuarni tamani qisuttuiffilinni, paasiniarlugit pujoorfiit, qisuttuiffiit, taakkununga ilaatillugit iffiorfiit, pujooriviit allallu aammalu eqqortumik aserfallatsaalineqarnerisut salinneqarsimanersullu. Qatserisartoqarnermik nakkutilliisup nakkutigissavaa pujoorfinnik saliisarneq ikuallattoornissamullu pitsaaliuinissami aalajangersakkat allat eqqortinneqarsimanersut.

Imm. 8. Naalakkersuisut aalajangersinnaavaat, imm. 7-imi misissuisarnissamut ilanngunneqarsimasumut taarsiullugit pujoorfinnik saliinerneq atattillugu nakkutilliineq suliarineqarsinnaasoq.

Imm. 9. Naalakkersuisut aalajangersinnaavaat qatserisartoqarnermik nakkutilliisoq nammineerluni imaluunniit taartigisani piginnaatitaasoq aqqutigalugu misissuisassaaq illorsuarnik eqqissimatitanik, oqaluffinnik, katersortarfinnik, ininik saqqummersitsivinnik nuannaarniartarfinnillu aammalu illorsuarnik allanik, taakku inersuini inuit amerlasuut katersuuttaraangata, aammalu illorsuarnik ikuallattoornissamut

navianaatilinnik peqqumaatinilli aammalu sullivinnik § 18-imut aamma § 19-imut atatitanik.

Imm. 10. Naalackersuisut qatserisartoqarnermik nakkutilliisunut ileqqoreqqusaliussap.

§ 5. Qatserisartut immikkoortoqarfiani tamani qatserisarnermi formandiususaaq kommunalbestyrelsip toqqassavaa. Qatserisartoqarnermik nakkutilliisoq qatserisarnermi formandiusutut atuutissaaq, qatserisartut immikkoortoqarfiani najugaqarfigisamini.

Imm. 2. Qatserisarnermi formandit toqqarneqartassapput § 4, imm. 2-miit 4-mut maleruagassiat naapertorlugit.

Imm. 3. Qatserisarnermi formandi najukkamini upalungaarsimasussaatitaasunut pisortaassaaq.

§ 6. Ikiuukkiartorasuarinnaasunut aamma upalungaarsimasussaatitaasunut qatserisartut kommunalbestyrelsimit atorfi initsinneqartassapput.

Imm. 2. Qatserisartunik atorfi initsitsisarneq § 4-imi, imm. 2-miit 4-mut maleruagassiat naapertorlugit pisarpoq.

§ 7. Naalackersuisut aalajangersinnaavaat, qatserisartoqarnermik nakkutilliisoq, qatserisarnermi assistentit qatserisarnermilu formandit aammalu qatserisartut immikkut ittumik ilinniartinneqassasut.

§ 8. Naalackersuisut peqqussutigisinnaavaat qatserinermi atorfi, qatserinermi maqitsiviit kalerrisaarutillu assigiiaartut atorfeqassasut.

§ 9. Pisortatimeqarfutaannik ukioq kaajallallugu imeqarfissamik pilersitsinermi pisortat pisussaapput erngup aqquutissaasa inissinneqarneranni annertussusiligaanerannilu nakkutigissallugu qatserinermi imermik pilersuinissamut naleqquttumik periarfissaqarnissaa aamma erngup aqquutaani qatserinermi imermik maqitsivissat pisariaqartunik amerlassusillit inississallugit, pisortat akiligaannik atatinneqartussat.

Imm. 2. Imermik maqitsiviit inissisimanerannut, aaqquissuusaaanerannut, imermik pilersorneqarnerannut - tassunga ilaatillugit erngup annertussusissaa naqitsinissaalu, tikeriataagassaaanerannut - tassunga ilaatillugit aqqusinernit tikitsiniarfissat taakkulu nivanneqartarnissaannut piumasaaqaatit -, qerisoornermit, aporneqarnermit allatigulluunniit ajoquserneqarsinnaanerannut isumannaallisaanissamut nalunaaqutsersorneqarnissaannullu malittarisassat erseqqinnerusut Naalackersuisunit aalajangersarneqassapput.

Imm. 3. Sumiiffinni, erngup aqquutaani inunnit ataasiakkaanit pigineqartuni imermik maqitsiviit pisortanit pigineqartut inissinneqarnissaat pisariaqartutut isumaqarfigineqaraangat imaluunniit imermik maqitsiviit inunnit ataasiakkaanit pilersinneqarsimasut qatserinermut nalinginnaasumut atorfeqarnissaat pisariaqartutut isumaqarfigineqarangaat, qatserisartoqarnermut ataatsimiititaliap imaluunniit kommunimi ataatsimiititaliap allap, takuuk § 2, imm. 4, aalajangersinnaavaat, inunniit ataasiakkaanut imermik pilersuiffiit taama ittut pisortanit nakkutigineqassasut aammalu atatinneqassasut aserfallatsaalineqarlutillu kommunip akiligaanik.

Imm. 4. Sumiiffinni, pisortanit imaluunniit inunnit ataasiakkaanit ukioq kaajallallugu imeqarfilianni maqitsivinnit imermik qatserinermut maqitsivinnit imermik qatserinermut atugassanik pilersorneqarsinnaanngitsuni, qatserisartoqarnermut ataatsimiititaliap imaluunniit kommunimi ataatsimiititaliap allap, takuuk § 2, imm. 4, imermik pilersuiffissatut akuersissutigisinnaavaat tasiliaq atajuartusaaq, taseq, kuuk imaluunniit immami ammaannartumi milluaavissaaq piareersimasooq, taakku piffissani qerinarfiusuni qatserivissatut ammatitatigut illersorneqarsinnaasumik ammatinneqassappata.

Imm. 5. Qatserisartoqarnermut ataatsimiititaliap imaluunniit kommunimi ataatsimiititaliap allap, takuuk § 2, inun. 4, isumaa naapertorlugu pissutsit ajornartinningippassuk, imermik pilersuiffissanik

aalajangersimasunik peqarnissaanik piumasarisat taamaatinneqarsinnaapput, qamutit imertaassuit pisariaqartunik amerlassusillit qamutitut qangatsiivinni kiassagaasuni inissinneqarsimasut atorlugit imermik pilersuivinnik nikissinnaasunik pilersitsisoqarpat.

Imm. 6. Imermik qatserutissamik aalajangersimasunik angallattakkanilluunniit pilersuinerup, takukkit iim. 4 aamma 5, attanneqarnerannut aningaasartuutit kommunip akilersinnaavai.

Imm. 7. Qatserinermut maqitsiviit imermillu pilersuviit ukiumut ikinnerpaamik marloriarluni misissorneqartassapput taamatullu aamma imermik pilersuisinnaassusiat pisariaqarnera naapertorlugu nakkutigineqartassalluni.

§ 10. Naalakkersuisut malittarisassiorsinnaapput qatserinermut atortussat sulisullu qassiunissaat pillugit.

Imm. 2. Qatserinermut atortussat pisariaqartut kommunip pissarsiarinngippagit aammalu naammattumik aserfallatsaalinnippagit, qatserisartunik pisariaqartitanik atorfnitsissimannippagit, imaluunniit kalerrisaaruteqarneq annertusanngippagu aserfallatsaalinnagulu, apeqquut Naalakkersuisunut suliassanngortinneqarsinnaavoq.

Imm. 3. Naalakkersuisut amigaatit iluarsitissinnaavai kommunip akiligaanik.

Kapitali 2.

Qatserisartoqarnerup nakkutiginnissaa pillugu.

§ 11. Kommunini tamani qatserisartoqarnermut oqartussaasut Naalakkersuisut qullersaraat.

Imm. 2. Naalakkersuisut nakkutillinerup ingerlanneqarnissaa akisussaaffigivaat, tamanna pillugu erseqqinnerusunik malittarisassioortassalluni, tassunga ilaatillugit qatserisartunik misiligutaasumik kalerrisaarisarnermut tunngasut.

Kapitali 3.

Ikuallattoqartillugu iliuusissat.

§ 12. Kialuunniip ikuallattumik imaluunniit pissutsinik ikuallannermik kinguneqarsinnaasumik takusaqartup navianartorsiortinneqartut erngerluni nalunaarfigissavai, qatserisartut kalerrisaassallugit aammalu inneq millisarniassallugu navianartorsiortitsisorluunniit pinngitsoortinniassallugu.

§ 13. Ikuallattoqartillugu kinaluunniit sapinngisani naapertorlugu ikiuuttussaataivoq.

Imm. 2. Ikuallattoornermi najuuttoq ikuallattoorfimmi naalagaatitaasup piumasaqarnera malillugu annaassiniarnermi qamisaaniarnermilu peqataasussaavoq. Imminut naalakkiutigineqartut maleruassavai aammalu peqquneqarnini malillugu suliassani akuerineqaqqaarnani qimassanagu.

Imm. 3. Inuit ataasiakkaat qatserinermut atortui, majuartarfiit, immersakkat assigisaallu, angallassissutit suugaluartulluunniit aammalu sulliviutillit maskiinaataat sulinermilu sakkuutit allat ikuallattoorfimmi naalagaatitamit qamisaanermut annaassiniarnermullu atugassanngorteqquneqarsinnaapput sulisussat pisariaqartut ilanngullugit.

Imm. 4. Kinaluunniit imm. 1-imiit 3-mut aalajangersakkat naapertorlugit annaassiniarnermi qamisaanermilu peqataasimasoq imaluunniit sakkuutinik angalassissutinilluunniit tamatumunnga atugassanngortitsisimasoq, atortussat ingerlatitaanerannut aningaasartuutitut matusissutissanik kommunimit pisinnaatitaavoq aammalu sulinerup nalaani atortut ajoqusigaanerannut taartisisussaatailluni, aammalu sulinermi aningaasarsissaraluanut annaasimasanut kommunimit taartisisussaataivoq.

§ 14. Ikuallattoqartillugu qamisaanerup annaassiniarnerullu pisariaqartitaatut annertussusilimmik qatserisartut isersinnaatitaapput inuit ataasiakkaat najugaannut, pisariaqassappat akornutit aqqutalugalugit peerlugillu.

Imm. 2. Qatserisartut pisinnaatitaapputtaaq illorsuarnik isaterinissamut, ikuallattoorfimmi naalagaatitaasup tamanna pisariaqartutut isumaqarfigippagu innerup siaruariartornera unitsinniarlugu.

Imm. 3. Qatserisartut taamaasiornikkut ajoqusiinerat ikuallattoornermi ajoqusiinertut isigineqassaaq.

Imm. 4. Ikuallattoqartillugu qatserisartut pisussaataitaapput imeq imiisivinniittoq aammalu sulluliani erngup aqquataaniittoq atussallugu.

§ 15. Qatserisarnermi formandi imaluunniit taanna najuutsinnagu taartaasoq taassuma toqqagaa qamisaanerup annaassiniarnerullu nalaani ikuallattoorfimmi naalagaassaaq.

§ 16. Ikuallattoqartillugu politiit pisariaqartitsineq naapertorlugu annertussusilimmik assiaqutsersuissapput, eqqissisimanerup attatiinnarneqarnissaa isumagissallugu aammalu iliuusissat inunnut tamanut isumannaallisaatitut pisariaqartut iluarsartuutissallugit. *Imm. 2.* Kinaluunniit assiaqutsiussamik ataqqinninnissamut aammalu politiit qatserisartulluunniit assiaqutsersukkamik imaluunniit ikuallattoqarfimmut tassanngaanniilluunniit aqputinik qimatseqqusinerannut malinninnissaminut pisussaavoq.

§ 17. Ikuallattoqartillugu qatserisartut maluginiassavaat ikuallannermut suna pissutaasimasinnaanersoq. Pasinartunik nassaartoqarpat politiit erninnaq nalunaarfigineqassapput, uppernarsaatissarlu sapinngisamik isumannaarneqassalluni.

Kapitali 4.

Sulliviit ikuallattoornissamik navianaateqartut il.il. pillugit.

§ 18. Sulliviit pilersinneqassappata, taakkunani sananeqassallutik, suliarineqassallutik imaluunniit atorineqassallutik imerpalasut, silaannaat imaluunniit akoorutissat qaartoorsinnaasut, ikuallajasut imaluunniit ikuallajatorujussuit, qatserisartoqarnermut ataatsimiititaliamit imaluunniit kommunimi ataatsimiititaliamit allamit, takuuk § 2, imm. 4, akuerineqarnissaq piumasarineqarpoq. Tamanna aamma atussaaq sulliviit taama ittut annertuumik allanngortiterneqarnerini, allineqarnerini imaluunniit ingerlanneqarnerisa allanngortinneqarnerini.

Imm. 2. Qatserisartoqarnermut ataatsimiititaliap imaluunniit kommunimi ataatsimiititaliap allap, takuuk § 2, imm. 4, piumasarisinnaavaa, sulliviit inissisimanerat, aqqissuunneqarsimanerat atorineqarnerallu pillugit pisariaqartutut isumaqarfigisanik iliuuseqartoqassasoq ikuallattoornissamut qaartoornissamulluunniit navianaat millisarniarlugu imaluunniit ikuallattoqartillugu qamisaanissamut inunnillu annaassiniarnissamut periarfissat ajunngitsut isumannaallisarneqarnissaannut. Tassunga ilaatillugu sullivik peqquneqarsinnaavoq qatserinissamut annaassiniarnissamullu atortussanik pissarseqqullugu aammalu nammineq atugassatut imermik pilersuiffeqaleqqullugu.

§ 19. Qatserisartoqarnermut ataatsimiititaliap imaluunniit kommunimi ataatsimiititaliap allap, takuuk § 2, imm. 4, aalajangersinnaavaa, illorsuit assigisaallu pillugit, pissutsit ikuallattoornissamut navianaateqartut atuukkaangata, imaluunniit nalilerujussuit aserorneqarnissamut navianartorsioraangata, iliuuseqartoqassasoq navianaatip millisinneqarnissaanut imaluunniit ikuallattoqartillugu annaassiniarnissamut periarfissat ajunngitsut isumannaallisarnissaannut. Aalajangersagaq taama ittoq aamma atortinneqarsinnaavoq oqaluffinnut, isiginnaartitsisarfinnut, illusisarfinnut, napparsimavinnut, parnaarussivinnut, illorsuarnut ilinniartitsiviusunut, saqqummersitsiviusunut imaluunniit

nuannaarniartarfusunut aammalu illorsuarnut imaluunniit ininut annerusunut inuit amerlasuut katersuuttarfinit. Tassunga ilaatillugu peqqussutigineqarsinnaavoq, qatserinermut atortussat pissarsiarineqassasut, aammalu qatserisartut qamutaannut aqutissat sananeqassasut aammalu qatserisartut majuartarfi tissalukaartaataallu inissiffissaqassasut.

Imm. 2. Qatserisartoqarnermut ataatsimiititaliap imaluunniit kommunimi ataatsimiititaliap allap, takuuk § 2, imm. 4, aalajangersinnaavaa katersortarfiit, nuannaariartarfiit, eqaarsaartarfiit, isiginnaartitsisarfiit assigisaalu atornerqarnerini ikuallattoornissamut sissuertunik pilersitsisoqassasoq, taakkunungalu akiliutissat akilerneqassasut katersuutsitsinermik aqqissuisunit akiliutissaq kommunalbestyrelsip aalajangerneqarsimasoq naapertorlugu.

§ 20. Qatserisartoqarnermut ataatsimiititaliap imaluunniit kommunimi ataatsimiititaliap allap, takuuk § 2, imm. 4, §§ 18 aamma 19 naapertorlugit aalajangiineri kommunalbestyrelsimut suliassanngortinneqarsinnaapput. Kommunalbestyrelsip aalajangiinera Naalakkersuisunut suliassanngortinneqarsinnaavoq.

Kapitali 5.

Pujoorfinnik saliineq il.il. pillugit.

§ 21. Naalakkersuisut, Kalaallit Nunaanni kommuneqarfiit kattuffiat isumasioreerlugu, pujoorfiit aamma putsup aqquai qanoq akulikitsiginik qanorlu salinneqartarnissaat, kikkut saliissanersut tamatumungalu akiliutissat kikkut akilissaneraat pillugit erseqqinnerusunik malittarisassiussapput.

Kapitali 6.

Ikuallattoornissamut navianaatip pitsaaliornissaanut iliuusissat pillugit.

§ 22. Kinaluunniit pisussaataavoq naleqquttumik mianersuussinissamut innermik, naneruutunik, ikitsisinik, arsakunik, akoorutissanik ikuallattoornissamut navianartunik, aammalu ikuallattoorutaasinnaasunik ikuallassaasinaasunilluunniit, aammalu inuit inoqutiminnut ilaasut imaluunniit sullivimminnut atasut taamatut mianersuussinissaat isumagissallugu. Pingaartumik sianigineqassaaq ikitsisit assigisaasalu meeqqanit tikinneqarsinnaanngitsuni paarineqarnissaat.

§ 23. Sanaartukkanik kallerup inneranut tunngasunik imaluunniit qaammaqquteqarfinnik, kiassaateqarfinnik, nukissiuuteqarfinnik, gasimik maskiinaqarfinnilluunniit allanik ikuallattoorutaasinnaasunik imaluunniit ikuallassaasinnaasunik piginnittup atuisulluunniip sanaartukkat taamaattut atussanngilai imaluunniit atortissanngilai, ajunngitsumik pissuseqanngippata malittarisassalluunniit malillugit pissuseqanngippata.

§ 24. Illorsuarnik ininilluunniit qisuttuiffinnik piginnittoq atuisorluunniit pisussaavoq qisuttuiffup aammalu tassangaanniit putsup aqquataa salinneqartarnissaanut.

Imm. 2. Pujoorfiit, qisuttuiffiit putsullu aqquataa aserfallatsaalinissaannut piginnittoq akisussaavoq. Atuisup amigaat paaseriaruniuk piaarnerpaamik piginnittoq imaluunniit qatserisartoqarnermik nakkutilliisoq tamanna pillugu nalunaarfiginissaanut pisussaavoq.

§ 25. Naalakkersuisut ikuallattoornissamut qaartoornissamullu navianaatit pitsaaliornissaat siunertaralugu innerup qaaimnaqqutillu atornerqarnissaat pillugit, akoorutissat paarineqarnerat, atugassanngortinneqarnerat, angallanneqarnerat aammalu ikuallajasut qaartoorsinnaasulluunniit, manngertut, imerpalasut imaluunniit silaannaartut ittut pillugit aamma sulliviit akoorutissanik taama ittunik uninngatitsiviusut, atuisut imaluunniit sanaartortut iluarsartuunnissaat pillugit, ikumatitsiviit

iluarsartuunneqarnissaat atorineqarnissaallu pillugit aammalu qaammaqutininut nukissiuutinut kiassarnermullu sanaartukkat pillugit najoqqutassiorninnaapput.

Imm. 2. Naalakkersuisut aaima ikuallattoornissamut navianaatip pitsaaliornissaanut pisariaqartutut isumaqarfigineqartut aammalu ikuallattoqartillugu qatserinissamut annaassiniarnissamullu periarfissat ajunngitsut isumannaallisarneqarnissaannut taamaattunik aalajangersagaliorsinnaapput.

Kapitali 7.

Pineqaatissiinerit atortuulersitsinerlu pillugit aalajangersakkat.

§ 26. § 12, 13, imm. 1-3, 18, 22, 23 aamma 24 unioqqutinneqarneri pillugit imaluunniit § 16, imm. 2 aamma § 19 naapertorlugit peqqussutit maleruarneqanngitsoorneri pillugit akiliisitsisoqarsinnaavoq, inatsisit allat naapertorlugit pineqaatissiissutissat sakkortunerusut atorineqassanngippata.

Imm. 2. Maleruaqqusani peqqussut naapertorlugu suliarineqarsimasuni aalajangerneqarsinnaavoq, tamakkuninnga unioqqutitsinerit akiliisitsinermik kinguneqarsinnaasut.

Imm. 3. Aktieselskabi, anpartsselskabi, andelsselskabi ingerlatseqatigiiffilluunniit taamaattoq unioqqutitsisimaguni, ingerlatseqatigiiffik immi akiliisinneqarsinnaavoq.

Imm. 4. Kommuni imaluunniit kommunit suleqatigiiffiat unioqqutitsisimaguni, kommuni kommunilluunniit suleqatigiiffiat immi akiliisinneqarsinnaavoq.

§ 27. Inatsisartut peqqussutaat una atortuulissaaq 1. januar 1993-imi, tamatumunngalu peqatigitillugu ikuallannaveersaartitsineq qatserinerlu pillugit Inatsisartut peqqussutaat nr. 9, 19. december 1986-imeersoq atorunnaarsinneqassalluni.

Imm. 2. Ikuallannaveersaartitsineq qatserinerlu pillugit Inatsisartut peqqussutaat nr. 9, 19. december 1986-imeersoq malillugu nalunaarutit il.il. suliarineqarsimasut atortuuginnassapput, Inatsisartut peqqussutaat una tunngavigalugu aallanngortinneqanngikkunik atorunnaarsinneqanngikkunilluunniit.

Imm. 3. Kalaallit Nunaanni qatserisartoqarnermik inatsit nr. 513, 21. december 1979-imeersoq tunngavigalugu nalunaarutit il.il. suliarineqarsimasut atortuuginnassapput, Inatsisartut peqqussutaat una tunngavigalugu aallanngortinneqanngikkunik atorunnaarsinneqanngikkuni1luunni it.

Namminersornerullutik Oqartussat, ulloq 30. oktober 1992.

Lars Emil Johansen

/

Ove Rosing Olsen

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit
Namminersorlutik Oqartussat inatsisinut toqqorsiviat
Naalakkersuisut